

EDUCUM



AFRICA
PL
8747
.9
RAL

hwaya tsebe

A L Ralusi

Tlhwaya tsebe

A L Ralusi

Tswana Poetry

It is illegal to photocopy any pages from this book
without the written permission of copyright holder.



Educum Publishers



Diteng

1. Segopotso sa matsalo a ga Keresete	1
2. Molaetsa go barutegi	2
3. Ga Maphutha-ditšhaba	3
4. Loso	4
5. Thamaga ya boJesu	5
6. Maithamako a mmonamogolo Lekau	6
7. Khutsana yoo-Raseemodi	7
8. Kopano ya Moše Le Modimo.....	8
9. A re rutegeng Batswana	9
10. Masole a Bophutatswana	10
11. Gae kwa Botswana.....	11
12. Ke a mo rata	12
13. A ke wena?	13
14. La diteko	15
15. Mosimane wa sefofu.....	16
16. Morwa yo mmotlana	17
17. Maikwatlhao	18
18. Boikapari	19
19. Robala motho wa me	20
20. Kgwanyape	21
21. Seromamowa	22
22. Thabisa digwagwa.....	23
23. Mariga.....	24
24. Mosuthalefaufau — Neil Armstrong	25
25. Azael Ralusi.....	26
26. Moopedi Mpharanyane	27
27. Palamente ya Bop.....	28
28. Kolo sa Klipvoor.....	29



BD547293



1. Segopotso sa matsalo a ga Keresete

Ditsala Moreneng, lona balatedi ba Gagwe,
Le a bo le fitlhile la segopotso,
'Pelo di tla bina 'dibeng sa boitumelo,
Re tla bo re etela ditsala.

Ke le legolo la moopa-kgora,
A re ketekeng Batswana,
A re se lebaleng go ya go obama,
A re yeng go lopa tshireletso Batswana.

Bana ba ga ntsho,
Lona bana ba mmala-a-sebilo,
A re lekeng go itshola,
Tshireletso le pabalesego ke boikarabelo.

Sekgopi sa lona se sengwe fela,
Le tlhaba go le monate le phirime 'pelo
di sisa,
Thipa tsa babolai di kgotshe kgodu-khibidu,
Di kgotshe botshelo jwa bana ba batho.

Dipelo tsa batsadi di botlhoko,
Mmangwana o lelela ngwana,
Ngwana a lelele rraagwe,
Le re phamoletse ditsala le ditshika.

Dijanaga le tsona ga di ikutlwe letsapa
Di ruthaganya bapagami ba ba bosutlha,
Re buisa ka ga dikotsi
Re bona dikotsi
Go boitumelo mo dipatlelong,
'Ping le 'Pinyana di mo boitumelong,
Aa, ke le legolo la kgora,
Letsatsi la pholoso ya rona.

2. Molaetsa go barutegi

Lò tletsetletse mo lefatsheng,
Lo tletsetletse mo dikantorong,
Khwekhwenthekhwenthe go utlwala tšhomi,
Ke bana ba ga Aferika.

Ke kabo ke itse tšhomi,
Ke kabo ke ya go bua le Tshwane,
A ke a nthute tšhomi le nna,
Ke ke ke gadikanye loleme.

He! mongwe ke yole o apere kobo,
Ga se kobo ke purapura,
Ga se kobo ke kapesa-thuto,
Hutshe e kete sejana sa Magosi.

A gotlholo go a gadingwa,
O kokoroga jaaka rotwe tota,
A ratha ka lonao fa fatshe,
Mokirinyo wa lona o utlwala fale.

Ke ba le bangwe Maakelong,
Ba phunya bagolo le bana,
Ba ntsha dikgoreletsi,
Ba ba roke ba tsele.

Tshwara ka thata ntshonyana!
Dirang lo thuse Batswana,
Batho ke go ipela ka bobona,
Ba ikgantshe ka thuto.

3. Ga Maphutha-ditšhaba

Ga twe ke gae la gabo khumo-kgolo,
Felo la bagolo le bana,
'Fatshe le meditseng bantsho,
La ba dira makgoba a moepo.

Gae la maphatlalatsa lefifi,
Bomampipi ba tsamaya ba swabile,
Heela! batho go diragetse motlholo,
Matlhagole o iteile lobota 'sedi la tllhaba.

O gae la basiami le baikepi,
O gae la bathubi le baagi,
Ba lala ba sasanka fifing,
Ba kabolola ba le bantsi ditshoka.

'Fatshe la Gauta 'fatshe le tlhokang tlhomogi,
Le lebaditse banna malapa,
Basadi la ba latlhisa bana,
Bana ba fetogela bagolo.

'Kgosi sa lona se sengwe fela
Botshelo jwa motho bo tshwerwe ka tlhale,
Borakokoro ba tshwere tlou ka maroo,
Ba mekamekana le mekaloba e.

4. Loso

E rile jale re ntse tlhageng,
Teng, teng, teng tengnyanaateng,
Molaetsa wa goroga,
Ga twe o thutse botala.

Batsei ba molelo ba re o tserwe ke loso,
Ijoo! banna loso o setlhogo jang!
Malapa ga a na ditlhogo,
O di phuphurile ka meno a 'go a sa boleng.

Ga o tshabe go tsena baratani ka legare;
Ba kgaogane keledi di tsorotla,
Ba go itse thata fela,
Wena selalome segolo.

Lorato lwa nnete lo theiwa ka wena,
O utlwe batho ba re re; "Re tla kgaogangwa . . . ,
O phamola masea a sa itse botshelo,
Wena morwa Kepotlakile.

O atlhametse ruri ga o kgore,
Mogodu wa gago ga o tlale,
'Tshika ka wena di a wela,
Ao! loso kutlwelobotlhoko e kae?

Ga o ditlhotlho o tsaya botlhe,
Magosi a rona o a tsere otlhe,
O re tlogetse re le dikhutsana,
O setlhogo le go feta Ramautle.

5. Thamaga ya boJesu

Dumela morwa thuba boleo!
O fepa batho ka dijo tsa mowa,
Ga o rwalwe ke motho a ipelaela,
O itshekile o le wesi fela,

O ruta thuto tsa nnete,
O dirile e e mabono,
O mogakolodi yo o molemo,
O re ruta botshelo.

O dirisiwa ditempeleng
Go sokololwa baitimokanyi,
Go kopanngwa banyalani,
Go tlhomamisiwa baetapele.

O lerile moriti o o monate,
Ba ba go tlhaloganyang ba a go boka;
Ba ba sa go tlhaloganyeng ba a tsielega;
Wena motswedi wa kagiso.

6. Maithamako a monnamogolo Lekau

O simolotse botshelo sentle le bantlo,
O ne a sa rate go ba bona ba wela iso,
Setlhabi sa pelo se tsene tengteng,
Madi a tlhoke bothijo fa a tsorotla pelong.

Ramautle o mo kgaotse pelo a godile,
A simolola go sotla lapa la 'gwe,
A tlhola a ba omanyana ba sa itumele,
A se pelotlhomogi pele ga bana.

Re mo utlwa a bua puo ya matswaka,
A iphetotse mosimanyana yo o teduputswa,
A se tlhole a ya go lekola bana,
O meditswe ke Gauta.

Sekolong ga a ba tlamele,
O itumelela go utlwa go twe ba falotse
A simolole go ipoka gare ga banna,
Fela ga a rate go itse gore ba jang.

Re bona mogatse ka makuku a kukusela,
A feta a rwele thotwana a bapatsa,
A tlhatloga dithaba a kgojwa,
A lekela ditshea botshelo.

Le ene tota rraabo ga a itlhokomele,
O itshotlile o ipolaisitse lefatshe,
O nyetse phafana
Moratiwa-mogolo wa gagwe.

O ka gamutlhwa pelo,
O lebile go twe kgwedi e fedile,
A ya go amogela mausausa a photi,
A a latlhele tlhapeding.

7. Khutsana yoo-Raseemodi

Rre o ntlogetse bogologolo tota,
O ntlogetse le go ntaela a sa ntaela,
Mme le ka leitlho ga ke a mmona,
Ba ntlogetse le mahutsana.

Bagaetsho le bua ka 'rato lwa motsadi,
Nna tota fa ele selo seo ga ke se itse,
Ba ntlogetse kwa ga Moja-ditlhogo,
Kwa teng ke tshelela thupa.

Ke tsoga ka Mahube a banna,
Ke ye go gama dikwera,
Di mpalelang ke jeswa moretlwa,
Tota ga ke swele eng?

A ke bomadimabe kgotsa eng?
Ke tlhoka mogakolodi kgotsa motlhokomedi;
Ba ntlogetse marageng batsadi,
Ba ile boikhutsong marung.

Bagolo, lona ditshwene nkutlweng tlhe,
Nthomelelang tlhokomelo le lorato,
Ke ntse magala ka marago,
Pelo ya me e tlhoka maitsetsepelo.

Ka metlha fa ke bona bana le batsadi,
Sera sa motho se nkema mometso,
'Keledi di ithare le dithama,
Ke utlwe botlhoko jwa ntho.

Go re ke tthatlogele go Modimo,
Ke etele booRaseemodi koo,
Ke ye go ja nakaladi,
Ke phuaganye borale jo.

8. Kopano ya Moše le Modimo

O ne a disitse letsomane,
Naga e kgabile e le ntle,
‘Tlhare di talafetse bontle,
Lonko lo goa Lobisa.

Phetso motlholo wa diragala,
Monakedi a o robile rwatla!
Wa laila setlhare se talafetse,
Sa tuka se sa šwe.

Ntswe le thibogile a le maibing,
“Moše, Moše rola ditlhako,”
Maikutlo a fetoga tota,
Aa! ntswe la Rradithata.

O di somotse a atamela,
‘Tokololo tsa roromaka,
A tlhagisa makoa otlhe,
Ntswe la re ke tla go dibela.

A romelwa Egepeto yo o lefifi,
Bathong ba kwatlile matswalo le kgosi,
A tsaya thobane le Arone,
Ba ya go golola Iseraele.

Egepeto a tiisa thamo,
A gana ka bana ba Modimo,
Metholo ya diragala
Malwetse a wela morafe

Iseraele a gololwa ka bonako,
Moše a eteletse pele,
Ga twe go iwa Kanana,
Lefatshe la kgora.

9. A re rutegeng Batswana

Pelo ya me e a tumukana,
Bagaetsho ba fetogile makgoba,
Ba ganana le lesedi,
Ba saila le mebila.

Ba ikiletsa go nna batho setšhabeng,
Ke ditau ba a garolaka,
Ga re tlhole re tsamaya bosigo,
Ba re kguatlanya ka dithipa,

Ga ke laye ke a gakolola,
Lo tlhoka pelo-namagadi tota!
Lo itshotlile lo garolaka setau,
Ke utlwa botlhoko ka re bana ba mpa.

A re lekeng go itlotla Batswana!
A re yeng sekolong betsho,
Re nne mosola setšhabeng,
Re thuseng puso ya rona.

10. Masole a Bophutatswana

Metšatša megakatsa mala,
Bomadiatlhageng boo-Bophuthatswana,
Ba utlwe ba opela ka diletswa,
Bana ba ga Tautona.

Fa ba tlhasela maru a kurutla,
A kurutla mokurutlo o segisang mala,
A kurutla mokurutlo wa go ka diga dinaledi,
'Phorogotlho tsoo-Bophuthatswana yo o pelonomi.

Bagaetsho nna ga ke na mafoko,
Baitse ba mafoko ba didimetse,
BoSeboni le boMorake ga ba bue,
Baitse go kgabisa Magosi.

Batho ba ka gotlholang banna ba suthe,
Di tlhasetse 'kgagapa tsoo-Mangope,
Di tlhasetse ntšwa di a ngaula,
Molatlhwa-le-boia o pate mogatla.

A re yeng Mmabatho!
Re ye go bona Dikwena,
Bophuthatswana o phuthile Batswana,
O tshotse bana ba gagwe sentle.

Ga ke rate go umaka phetelela,
E se re gongwe fatshe la nteba,
Tsebe tsa nteba
Ngwale boela . . .

11. Gae kwa Botswana

Ke eletsa kgatsele ya kgomo tsa ga rre,
Kgakala le fatshe la Gauta,
Kgololosego e letse Botswana,
Botswana naga ya mašwi.

Ke tlhologeletswe mafulo a manaana,
Motseng wa Kgama-a-Sekgoma,
Motse wa kagiso le ditshegwana,
Lefatshe la boitumelo le ditsala.

Ke tlhologeletswe Botswana-a-Kgama,
Koo nka tshelang botshelo ka botlalo,
Botshelo kwa teng tswina,
Gaetsho ga Seretse-a-Kgama.

Dumelang lona barwa-a-Kgama!
Ke lo gopotse ka kwano fatsheng la Gauta,
Le Gaborone-a-digosi,
Kwa teng ke diba sa boiketlo.

'Toro di tla mogopolong wa me,
'Tsala tsa me di a mpitsa,
Ke tle boiketlong Botswana,
Ke kgwabofatse makaba oo-Kgama.

Ke tseleng betsho,
Ntlogeleleng a mannye le nna,
E re ke goroga a bo a fatlhogile,
Ntlogeleleng a mafatshwana.

12. Ke a mo rata

Bophirima jwa Teransefala,
Go agile meno-masweu,
Ke boitumelo jwa matlho a me,
Ke boipelo jwa pelo ya me.

Madume Tshedi wa motho,
'Talama thamong boithibelelo,
'Thibelelo jwa 'rato lwa nnete,
Huba sa me ke go gopotse.

Pelo ya me e etetswe ke bohutsana,
Ke lora ditlhatswapelo ka wena,
O! Tshedi ke go gopotse kala ya me,
Oho! Tshedi tshedisa pelo ya me.

Ke a tle ke ipone nageng,
Se ntsisitseng ke sa se itse,
'Tshwantsho di tla kgopolong ya me,
Ke go bona o nyenya.

Wa re ke tla go bona leng thunya sa me?
Ntirele o o fisang banna ditedu,
Nna moratadilo ke godume,
Metsi masetlha maedisa pelo.

Nkalele tlhe phate ke rapame,
Nna motsamai ke ikhutse dinao,
Ke tshware letshanyana fela,
Ke nonofele tsela.

13. A ke wena?

Baana! a kgotsa ke kopane le Gaarobale?
'Fatshe le le kana-kana le,
Ija! 'Fatshe leno le ditiro ruri,
Le mpontsha dilo di sa lejwe.

A tota ke wena kgaitsadiake?
A gongwe o morudi Pulane?
Wena kgarebe e tshetlhana ele,
Nnyaa ga ke dumele betsho.

A o nna mo legageng wa ga mma?
Lefatshe le go dirakantse dilo tota,
Ao! o ntlhabisetsang ditlhong!
O kotame letlapa o diga keletsana.

O ne o thusa botlhe,
Botlhe ba go rata,
O ne o sa nkge jaana,
Wa simolola botagwa.

Ba go tlogetse le makgasanyana fela,
Ba ile botlhe bomathhale,
O a sunetsa-sunetsa, phimola keledi eo!
O moipolai ga o lelelwe.

Ba lekile go go kgala bagolo,
Wa phuaganya mafoko a bona,
Gompieno o talafaditse mathonyana,
Ba ile boikhutsong bagolo ba rona.

O ne o itse thuto ya nnete,
O tlotla botlhe o se letlhotlho,
Ramautle a go bolaya segakolodi,
Tswalo lwa gago lwa kwatlalala.

O simolotse go nyatsa le go kgoba batho,
Gonne Modimo o bonya go araba,
O go neile sebaka sa teofo,
Gompieno o rutilwe magokonyane.

14. La diteko

Le fitlhile la diteko,
Ke semphete-ke-go-fete,
Barutwana ba botsa barutabana,
Mabapi le dirutwa tsa bona.

Ahaa! ke nako ya boraboroko,
Ba segwa ke mala a masesane,
Ga ba itse gore e tla ba pota kae,
Baitshepi ba e emetse.

Ba tlhabile lošalaba,
Ba tshameka kgwele
Ditshwakga di itswaletse ke go ne di buisang,
Masego dikwena-a-madiba.

15. Mosimane wa sefofu

Bagaetsho lo bua ka phatsimo,
Lo bua ka mebala e e farologaneng,
Lo bua ka bontle jwa tlhago,
Tse nna ke sa di itseng.

Lo bua ka magosi a gaetsho,
Lo bua ka diaparo tse dintle,
Lo bua ka batsadi,
Bao nna ke sa ba itseng.

A botlhoko jwa go foufala!
A botlhoko jwa go sa itse sepe sa botshelo!
Ke kuela dithabeng
Thuso ya me e tla tswa teng.

16. Morwa yo mmotlana

Phuthololo e e boitshepo,
E lotlega ka morwa yo mmotlana,
Ga twe e ne e le mosiami,
A dirisanya le bagolo sentle.

Tsatsi lengwe rraagwe a itebitse,
Mosimane a lopa boswa;
O lekile go mo lemosa kotsi,
A tatalala a tiisa thamo.

O tsere leruo a wela tsela,
O rathakile boswa le ditsala,
La goroga la goo-Rramotho,
A wela tsela pelo e se na boikaego.

17. Maikwatlhao

Ijoo ke sotlegelang!
Lefatshe ga o nkutlwele botlhoko keng?
A ga o bone gore o ntshotlile?
Nna pelonomi o ntlogele.

Mme kana dilo ke di itirile,
Ga ke a tshwanela go lela,
Ga ke itse kwa batsadi ba go ileng,
Fa e sale ke ngala legae.

Ijoo! ke wa ga mang nna!
Ke fitlhela la me legae e le letlotla,
Dipota ke motse wa motlhwa,
O medile majang e kete bobi.

Molao wa mogolo ga o rojwe,
Ba lekile go mpontsha tsela,
Ka gana ka ikepa,
Lefatshe phatloga ke tsene tlhe!

Gompieno ke nosi ka monwana,
Ga ke na le fa e le mogomotsi,
Ga ke itse gore a ba a tshela,
Ke gatile tshetlho ka dinao.

18. Boikapari

Fa bo seyo go boitumelo,
Ditshego tsa teng di a fetela,
Mpa di nna di le molelo,
Botshelo bo nna manobonobo.

Bo tsena kagiso e a tswa,
Tlala e tsaya seditse,
Go tsoga dikgotlhang ka fa tlong,
Dintwa tsa teng ga di fele.

Bo jesa maswe e le tota,
Bo fetotse batho makgoba,
Bana ba rata thuto,
Fa bo le teng ga ba e bone.

19. Robala motho wa me

Bomogoloo ba ile letsomo,
'Kgomo di gorogile di tlhoka mogami,
Ba tla go gamela ba goroga;
Ba go tlosa tlala ngwanaka.

Rraago o re tlogetse le khutsafalo,
Bomogoloo ke bona borraago,
Robala selonyana se sentle,
Se tshwenyega kgopolo motho wa me.

Tsena fatsheng la ditoro,
O lebale khutsafalo,
Idibala go le gonnye,
Bo tla go tshwara motho wa me.

Le nna mmago ke a feta,
Ke digilwe ke ditlhabi,
Ga ke tlhole ke ikutlwa botshelo,
Ke boela gae gaetsho.

Bomogoloo ba go tlhokomele,
Ba go tshware ka se se bonolo,
Lo sale banaka ke a lo sia,
Ke tla lo gopola ka paka tsotlhe.

20. Kgwanyape

Tseke-tseke, kurrr, kurrrr!
Phefo di a tsubutlaka,
Kwa borwa go bonala lalailai!
Tšhwega a tiisa mebele.

'Nonyane di saila loaping,
Tsenang mo matlong bana!
E tlhaga e famotse dinko,
E eta e rutlomolola matlo.

E a fudinya e a laela,
Matlhotlhapelo fa e fetileng gona,
Bosetlhogo jwa yona bo a boifisa,
E bolaya phologolo go sa le go nnga.

E fetile Batswana,
A re lootseng dithipa,
Re lebale setlhogo sa yona,
Re tsweleng ka botshelo.

Batsomi a re tseneng sekgwa,
A reyeng go nopa diphologolo,
Botlhogoputswa ba eleditse dišabo,
E lo tshidisa jalo kgwanyape.

21. Seromamowa

Ruri Basweu lo a gakgamatsa!
Lo tlhamile seromamowa,
Ke lebokoswana lentle,
Ditshitswana ka fa gare.

Heelang! reetsang se kgona go bua!
Matlhagojana o kgotlile konopo sa araba,
Di a dumedisana ditsala go monate,
Ba itumelela mmimo wa sone.

Ebu selo se se itse puo tsotlhe,
Se re itsese tiragalo tsa lefatshe,
Se re itsese dintsho tsa ditsala,
Se re gomotsa ka difela.

Ke molwantshi wa bodutu,
Ke moratiwa go botlhe,
Se robegile ba a tlhonama,
Rotlhe re a sulafalelwa.

22. Thabisa digwagwa

Dumela wena morwa masenya!
Bagolo ga ba re tlhokomele,
Ba tlhokometse wena totlhanyi,
Ba go tlhokometse go gaisa bana.

Barwarre ba fedile fedi!
Metlhašwana ya bontšhwe,
O thubetse banna le basadi metse,
O tladitse batho le naga.

Mogonwi ga a na bothijo,
Banna ke bale ba a feta,
Ba tswetse wena letsomo,
E kete ba ile go bolaya tau.

Fa nka bona mogoribolodi,
Ke tla mo kgautlaganya mala ka segai,
O sentse tšhaba sa ga Ntshonyana,
A se latlhela bodibeng.

Motho a go nole o atlhametse ruri,
Puo ya gagwe ya motho a atametse loso,
O tsamaya a re tlhapatsa,
Ee le fa pele ga bana tota.

23. Mariga

O rogile Seetebosigo,
Seetebosigo di a tlhaela,
E se re gono wa sitwa,
Baeng ikitseng go tsamaya.

E rogile ya Seetebosigo,
Naga e hutsafetse,
Dikobo di hupere batho,
Tiro di eme ga di tsewelele.

Majang a swabile swabi,
Naga e befile ga e kgathlise,
Bontle jole jwa selemo bo ile,
Ao! mariga o setlhogo tota.

24. Mosutlhalefaufau - Neil Armstrong

A dira tumalano le bankaene,
Tumalano ya go etela kgosigadi,
Fatshe le ne le didimetse tu!
Go se sekgoreletsisi.

Ka robonngwe maitiso,
Molaetsa wa goroga ka bagasi
Armstrong o etela ngwedi,
O ya go leka botshelo teng.

Re e bona e feta e otlala diphefo,
Koloji ya diphefo Aphoto II,
'Fatshe la duma bosigong
Ga tse o ya go gogela batho metsi ka mosele.

A tla a phuthetse thuto,
Gompiano re itse kemo ya mohumagatsana,
Thuto ya gagwe e aname fatshe lotlhe
Batshogi ba itumetse.

Ke go tlhokela mafoko wetsho,
Nkabo ke go rutha phetelela,
O bo o sale o le manokonoko,
Ke go rathake ka molamu wa mafoko.

25. Azael Ralusi

Ke ngwana-a-namane dikgolo,
Namane di marudi-rudi,
Tse e ya reng di gata bojang bo lalaane,
Tsona di le mebele e kgolokwane.

Bagaetsho ba re ke Mophuthing,
Nyaa betsho ke ngwana-a-Seepapitso-a-Mogale,
Ke mokganya mmele oo-Mogale,
Maje-a-dipotoku mapotokolola melapo.

Ke legadimana ntweng njong ga ke na wetsho
Ke leja ledumaduma loo-Mogale,
Moopo yo o meno masweu,
Mosimane wa seema ka tlhako.

26. Moopedi Mpharanyane

Wa rona mogolo o re tlogetse,
Betsho ga a re tlogela,
O phamotswe ke setsuatsue,
O ikhuditse betsho a re gomotsegeng.

Betsho ke a dumela tse dintle ga di nne,
O dirile dikgolo Mpharanyane,
E ne e le mogomotsi a gomotsa balatlhegelwa,
Robala, Robala sentle morwa Mpharanyane.

O re tlogeletse 'ntswe la gagwe,
Mo utlwe a le tshoeditse ka kutlobotlhoko,
A re "Morena re thuse kaofela,"
Oho! bosetlhogo jwa loso!

Bagaetsho fa a ne a re direla jaana rona!
O kopantse manyalo,
Baikapi, ba boela Moreneng,
Diganana tsa siama.

Dikwena boelang madibeng!
Boelang mawatleng dilalome,
Kwena-kgolo e ikhuditse,
A re gomotsegeng.

27. Palamente ya Bop

Diraditsile kgaitsadiake tlaya ke go lome tsebe!
Jale ke etetse Montshiwa,
Ka bona botswerere jwa puso,
E kete nka lebelela ruri.

Kago e ntle e okame' motse,
Ke maphatsiphatsi a mantle,
A dirilwe ke motho ka tlhokomelo,
A sa potlakela phetso.

Ka tsena teng' atla di ngaparetse molomo,
Lekau le pagame pitse,
Botlhe ba apere dikarolwana tse tharo,
Ntlong ya molao.

28. 'Kolo sa Klipvoor

Godimo ga thaba,
Go lebone-legolo,
'Sedi legolo la botsalano,
Batshubi ba lona ba a refosana.

Le latlhetse lesedi motseng,
Pilara tsa lona di agilwe ka thata,
Banna le basadi ba omana ka magofi,
Go se kagiso ruri.

Se rutile makau le makgarebe,
Gompieno se ruta bana ba bona,
Se inotse bontsi thankgeng,
Se tlišitse tľhabologo motseng.

E rile ke botsa gore'ng se le thabeng?
Ba re gore se bonwe,
Nnyaa betsho ga se maikaelelo ao,
Se supa kemo-kgolo ya thuto.